

摘藻堂四庫全書薈要

史部

欽定四庫全書薈要卷六千九百十四

史部

明史卷三百二十一

大學士張廷玉等奉 敕修

列傳第二百九

外國二

安南

安南古交趾地唐以前皆隸中國五代時始為土人曲承美竊據宋初封丁部領為交趾郡王三傳為大臣黎

桓所篡黎氏亦三傳為大臣李公蘊所篡李氏八傳無
子傳其壻陳日炬元時屢破其國洪武元年王日燿聞
廖永忠定兩廣將遣使納款以梁王在雲南未果十二
月太祖命漢陽知府易濟招諭之日燿遣少中大夫同
時敏正大夫段悌黎安世等奉表來朝貢方物明年六
月達京師帝喜賜宴命侍讀學士張以寧典簿牛諒往
封為安南國王賜駝紐塗金銀印詔曰咨爾安南國王
陳日燿惟乃祖父守境南陲稱藩中國克恭臣職以永

世封朕荷天地之靈肅清華夏馳書往報卿即奉表稱
臣專使來賀法前人之訓安遐壤之民睦茲勤誠深可
嘉尚是用遣使齎印仍封爾為安南國王於戲視廣同
仁思效哲王之盛典爵超五等俾承奕葉之遺芳益茂
令猷永為藩輔欽哉賜日燿大統厯織金文綺紗羅四
十匹同時敏以下皆有賜以寧等至日燿先卒姪日燿
嗣位遣其臣阮汝亮來迎請誥印以寧等不予日燿乃
復遣杜舜欽等請命於朝以寧駐安南俟命時安南占

城構兵帝命翰林編修羅復仁兵部主事張福諭令罷
兵兩國皆奉詔明年舜欽等至告哀帝素服御西華門
引見遂命編修王廉往祭賻白金五十兩帛五十匹別
遣吏部主事林唐臣封日煙為王賜金印及織金文綺
紗羅四十匹廉既行帝以漢馬援立銅柱鎮南蠻厥功
甚偉命廉就祀之尋頒科舉詔於其國且以更定嶽瀆
神號及廓清沙漠兩遣官詔告之日煙遣上大夫阮魚
中大夫莫季龍下大夫黎元普等謝恩貢方物魚卒於

道詔賜其王及使臣而送兼柩歸國頃之復仁等還言
却其賕不受帝嘉之加賜季龍等四年春遣使貢象賀
平沙漠復遣使隨以寧等來朝其冬日煙為伯父叔明
逼死叔明懼罪貢象及方物踰年至京禮官見署表非
日煙名詰得其實詔却之叔明復朝貢謝罪且請封其
使者抵言日煙實病死叔明遜避於外為國人所推帝
命國人為日煙服而叔明姑以前王印視事七年叔明
遣使謝恩自稱年老乞命弟煊攝政從之煊遣使謝恩

請貢期詔三年一貢新王世見尋復遣使貢帝令所司
諭却且定使者毋過三四入貢物無厚十年煇侵占城
敗沒弟煒代立遣使告哀命中官陳能往祭時安南怙
強欲滅占城反致喪敗帝遣官諭前王叔明毋構釁貽
禍以叔明實主國事也叔明貢方物謝罪廣西思明土
官訴安南犯境安南亦訴思明擾邊帝移檄數其奸誑
罪敕守臣勿納其使煇懼遣使謝罪頻年貢奄豎金銀
紫金盤黃金酒尊象馬之屬帝命助教楊盤往使令饋

雲南軍餉煒即輸五千石於臨安二十一年帝復命禮部郎中邢文偉齎敕及幣往賜煒遣使謝復進象帝以其頻煩且貢物侈命仍三歲一貢毋進犀象時國相黎季犛竊柄廢其主煒尋弑之立叔明子日焜主國事仍假煒名入貢朝廷不知而納之越數年始覺命廣西守臣絕其使季犛懼二十七年遣使由廣東入貢帝怒遣官詰責却其貢季犛益懼明年復詭詞入貢帝雖惡其弑逆不欲勞師遠征乃納之大軍方討龍州趙宗壽命

禮部尚書任亨泰御史嚴震直諭日焜母自疑季聲聞
言稍自安帝又遣刑部尚書楊靖諭令輸米八萬石餉
龍州軍季聲輸一萬石餽金千兩銀二萬兩言龍州陸
道險請運至憑祥洞靖不可令輸二萬石於沱海江江
距龍州止半日靖因言日焜年幼國事皆決季聲父子
乃敢觀望如此時帝以宗壽納款移兵征向武諸蠻遂
諭靖令輸二萬石給軍而免其所餽金銀明年季聲告
前王叔明之訃帝以叔明本篡弑弔祭則獎亂止不行

移檄使知之思明土官黃廣成言自元設思明總管府
所轄左江州縣東上思州南銅柱為界元征交趾去銅
柱百里立永平寨萬戶府遣兵戍守令交人給其軍元
季喪亂交人攻破永平越銅柱二百餘里侵奪思明所
屬邱溫如整慶遠淵脫等五縣地近又告任尚書置驛
思明洞登地臣嘗具奏蒙遣楊尚書勘實乞敕安南以
五縣地還臣仍畫銅柱為界帝命行人陳誠呂讓往諭
季犛執不從誠自為書諭日焜季犛貽書爭且為日焜

書移戶部誠等復命帝知其終不肯還乃曰蠻夷相爭

自古有之彼恃頑必召禍姑俟之建文元年季犛弑日

焜立其子顥又弑顥立其弟貴方在襁褓中復弑之大

殺陳氏宗族而自立更姓名為胡一元名其子蒼曰胡

奎謂出帝舜裔胡公後僭國號大虞年號元聖尋自稱

太上皇傳位奎朝廷不知也成祖既承大統遣官以即

位詔告其國永樂元年奎自署權理安南國事遣使奉

表朝貢言高皇帝時安南王日燿率先輸誠不幸早亡

後嗣絕臣陳氏甥為衆所推權理國事於今四年望天恩賜封爵臣有死無二事下禮部部臣疑之請遣官廉訪乃命行人楊渤等齎敕諭其陪臣父老凡陳氏繼嗣之有無胡奎推戴之誠偽具以實聞賚奎使者遣還復命行人呂讓卹智賜絨錦文綺紗羅既而奎使隨渤等還進陪臣父老所上表如奎所以誑帝者乞即賜奎封爵帝乃命禮部郎中夏止善封為安南國王奎遣使謝恩然帝其國中自若也思明所轄祿州西平州永平寨

為所侵奪帝諭令還不聽占城訴安南侵掠詔令修好
奎陽言奉命侵掠如故且授印章逼為屬又邀奪天朝
賜物帝惡之方遣官切責而故陪臣裴伯耆詣闕告難
言臣祖父皆執政大夫死國事臣母陳氏近族故臣幼
侍國王官五品後隸武節侯陳渴真為裨將洪武末代
渴真禦寇東海而賊臣黎季犛父子弑主篡位屠戮忠
良滅族者以百十數臣兄弟妻孥亦遭害遣人捕臣欲
加誅醢臣棄軍遁逃伏處山谷思詣闕廷披瀝肝膽展

轉數年始睹天日竊惟季犛乃故經畧使黎國髦之子
世事陳氏叨竊寵榮及其子蒼亦蒙貴任一旦篡奪更
姓易名僭號改元不恭朝命忠臣良士疾首痛心願興
弔伐之師隆繼絕之義蕩除奸凶復立陳氏後臣死且
不朽敢效申包胥之忠哀鳴闕下惟皇帝垂察帝得奏
感動命所司周以衣食會老撾送陳天平至言臣天平
前王日烜孫旃子日燧弟也黎賊盡滅陳族臣越在外
州獲免臣僚佐激於忠義推臣為主以討賊方議招軍

賊兵見迫倉皇出走竄伏巖谷萬死一生得達老撾恭
聞皇帝陛下入正大統臣有所依歸匍匐萬里哀懇明
庭陳氏後裔止臣一人臣與此賊不共戴天伏祈聖慈
垂憐迅發六師用章天討帝益感動命所司館之奎方
遣使賀正旦帝出天平示之皆錯愕下拜有泣者伯耆
責使者以大義惶恐不能答帝諭侍臣奎父子悖逆鬼
神所不容而國中臣民共為欺蔽一國皆罪人也朕烏
能容三年命御史李琦行人王樞齋敕責奎令具篡弒

之實以聞雲南寧遠州復訴奎侵奪七寨掠其壻女奎遣其臣阮景真從琦等入朝謝罪抵言未嘗僭號改元請迎天平歸奉為主且退還祿州寧遠地帝不虞其詐許之命行人聶聰齎敕往諭言果迎還天平事以君禮當建爾上公封以大郡奎復遣景真從聰等還報迎天平聰力言奎誠可信帝乃令天平還國敕廣西左右副將軍黃中呂毅將兵五千送之四年天平陞辭帝厚加賚敕封奎順化郡公盡食所屬州縣三月中等護天平

入難陵關將至芹站奎伏兵邀殺天平中等敗還帝大怒召成國公朱能等謀決意討之七月命能佩征夷將軍印充總兵官西平侯沐晟佩征夷副將軍印為左副將軍新城侯張輔為右副將軍豐城侯李彬雲陽伯陳旭為左右參將督師南征能至龍州病卒輔代將其軍入安南坡壘關傳檄數一元父子二十大罪諭國人以輔立陳氏子孫意師次芹站遂造浮橋於昌江以濟前鋒抵富良江北嘉林縣而輔由芹站西取他道至北江

府新福縣譟晟彬軍亦自雲南至白鶴乃遣驃騎將軍
朱榮往會之時輔等分道進兵所至皆克賊乃緣江樹
柵增築土城於多邦隘城柵連九百餘里大發江北民
二百餘萬守之諸江海口皆下木椿所居東都嚴守備
水陸兵號七百萬欲持久以老官軍輔等乃移營三帶
州箇招市江口造戰艦帝慮賊緩師以待瘴癘敕輔等
必以明年春滅賊十二月晟次洮江北岸與多邦城對
壘輔遣旭攻洮州造浮橋濟師遂俱抵城下攻拔之賊

所恃惟此城既破膽裂大軍循富良江南下遂擣東都
賊棄城走大軍入據之薄西都賊大燒宮室駕舟入海
郡縣相繼納款抗拒者輒擊破之士民上書陳黎氏罪
惡日以百數五年正月大破季犛於木丸江宣詔訪求
陳氏子孫於是耆老千一百二十餘人詣軍門言陳氏
為黎賊殺盡無可繼者安南本中國地乞仍入職方同
內郡輔等以聞尋大破賊於富良江季犛父子以數舟
遁去諸軍水陸並追次茶籠縣知季犛走乂安遂循舉

厥江追至日南州奇羅海口命柳升出海追之賊數敗
不能軍五月獲季犛及偽太子於高望山安南盡平羣
臣請如耆老言設郡縣六月朔詔告天下改安南為交
趾設三司以都督僉事呂毅掌都司事黃中副之前工
部侍郎張顯宗福建布政司左參政王平為左右布政
使前河南按察使阮友彰為按察使裴伯者授右參議
又命尚書黃福兼掌布按二司事設交州北江諒江三
江建平新安建昌奉化清化鎮蠻諒山新平演州乂安

順化十五府分轄三十六州一百八十一縣又設太原

宣化嘉興歸化廣威五州直隸布政司分轄二十九縣

其他要害咸設衛所控制之乃敕有司陳氏諸王被弑

者咸予贈諡建祠治塚各置灑埽二十戶宗族被害者

贈官軍民死亡暴露者瘞埋之居官者仍其舊與新除

者參治黎氏苛政一切蠲除遭刑者悉放免禮待高年

碩德鰥寡孤獨無告者設養濟院懷才抱德之彥敦遣

赴京又詔訪求山林隱逸明經博學賢良方正孝弟力

田聰明正直廉能幹濟練達吏事精通書算明習兵法
及容貌魁岸語言便利膂力勇敢陰陽術數醫藥方脉
諸人悉以禮敦致送京錄用於是張輔等先後奏舉九
千餘人九月季犛蒼父子倖至闕下與僞將相胡杜等
悉屬吏赦蒼弟衛國大王澄子芮所司給衣食六年六
月輔等振旅還京上交阯地圖東西一千七百六十里
南北二千八百里安撫人民三百一十二萬有奇獲蠻
人二百八萬七千五百有奇象馬牛二十三萬五千九

百有奇米粟一千三百六十萬石船八千六百七十餘艘
軍器二百五十三萬九千八百於是大行封賞輔進英
國公晟黔國公餘叙賚有差時中朝所置吏務以寬厚
輯新造而蠻人自以非類數相驚恐陳氏故官簡定者
先降將遣詣京師偕其黨陳希葛逃去與化州偽官鄧
悉阮帥等謀亂定乃僭大號紀元興慶國曰大越出沒
又安化州山中伺大軍還即出攻盤灘鹹子關扼三江
府往來孔道寇交州近境慈廉威蠻上洪天堂應平石室

諸州縣皆響應守將屢出討皆無功事聞命沐晟為征
夷將軍統雲南貴州四川軍四萬人由雲南往討而遣
使齎敕招降者予世官賊不應晟與戰生厥江大敗呂
毅及參贊尚書劉儁死之七年敗書聞益發南畿浙江
江西福建湖廣廣東廣西軍四萬七千人從英國公輔
征之輔以賊負江海不利陸師乃駐北江仙游大造戰
艦而撫諸遭寇逋播者遂連破慈廉廣威諸營柵偵其
黨鄧景異扼南策州盧渡江太平橋乃進軍賊子闕偽

金吾將軍阮世每衆二萬對岸立寨柵列船六百餘艘
樹椿東南以扞蔽時八月西北風急輔督陳旭朱廣俞
讓方政等舟齊進礮矢颺發斬首三千級生禽偽監門
將軍潘低等二百餘人獲船四百餘艘遂進擊景異景
異先走乃定交州北江諒江新安建昌鎮蠻諸府追破
景異太平海口獲其黨范必栗時阮帥等推簡定為越
上皇別立陳季擴為帝紀元重光乃遣使自稱前安南
王孫求封爵輔叱斬之由黃江阿江大安海口至福成

江轉入神投海口盡去賊所樹椿柵十餘日抵清化水
陸畢會定已奔濱州季擴走又安帥景異等亦散亡於
是駐軍捕餘黨定走美良縣吉利冊輔等窮追及之定
走入山大索不得遂圍之并其偽將相陳希葛阮汝勵
阮晏等俱就擒先是賊黨阮師檜僭王與偽金吾上將
軍杜元措等據東潮州安老縣之宜陽社衆二萬餘人
八年正月輔進擊之斬首四千五百餘級禽其黨范支
陳原卿阮人柱等二千餘人悉斬之築京觀輔將班師

言季擴及黨阮帥胡具鄧景異等尚在濱州又安逼清
化而鄧銘塞神投福成江口據清化要路出沒又安諸
處若諸軍盡還恐沐晟兵少不敵請留都督江浩都指
揮俞讓花英師祐等軍佐晟守禦從之五月晟追季擴
至虞江賊棄柵遁追至古靈縣及會潮靈長海口斬首
三千餘級獲偽將軍黎弄季擴大威奉表乞降帝心知
其詐姑許之詔授交趾布政使阮帥胡具鄧景異鄧銘
並都指揮陳原樽右參政潘季祐按察副使詔既下念

賊無悛心九年復命輔督軍二萬四千合晟軍討之賊據月常江樹椿四十餘丈兩崖置柵二三里列船三百餘艘設伏山右秋輔晟等水陸並進阮帥胡具鄧景異鄧鎔等來拒輔令朱廣等連艦拔椿以進自率方政等以步隊勦其伏兵水陸夾攻賊大敗帥等皆散走生擒偽將軍鄧宗稷黎德彛阮忠阮軒等獲船百二十艘輔乃督水軍勦季擴聞石室福安諸州縣偽龍虎將軍黎蕊等斷銳江浮橋阻生厥江交州縣衛道路遂往征之

慈及范慷來拒慈中矢死斬偽將軍阮陲獲偽將軍楊
汝梅防禦使馮翕斬首千五百級追殺餘賊殆盡慷及
杜箇旦鄧明阮思域等亦就禽十年輔督方政等擊賊
舟於神投海大敗之禽偽將軍陳磊鄧汝戲等阮帥等
逖遁追之不及輔軍至乂安土黃偽少保潘季祐等請
降率偽官十七人上謁輔承制授季祐按察副使署乂
安府事於是偽將軍觀察安撫招討諸使陳敏阮士勤
陳全勗陳全敏等相繼降明年輔及晟合軍至順州阮

帥等設伏愛子江而據昆傳山險列象陣迎敵諸軍大破之生禽偽將軍潘徑阮徐等五十六人追至愛母江賊潰散鄧銘弟偽侯鐵及將軍潘魯潘勤等盡降明年春進軍政平賊帥胡同降言偽大將軍景異率黨黎蟾等七百人逃還蠻昆蒲柵遂進羅江舍騎步行比至賊已遁追至叱蒲捺柵又遁昏夜行二十餘里聞更鼓聲輔率政等銜枚疾趨黎明抵叱蒲幹柵江北賊猶寨南岸官軍渡江圍之矢中景異脇禽之銘及弟銳亡走追

禽之盡獲其衆別將朱廣追偽大將軍阮帥於暹蠻大
搜遲人闔諸山獲帥及季擴等家屬帥逃南靈州依土
官阮茶彙指揮薛聚追獲帥斬茶彙初鄧銘之就執也
季擴逃乂安竹排山輔遣都指揮師祐襲之走老撾祐
踵其後老撾懼官軍躡其地請自縛以獻輔檄索之令
祐深入克三關抵金陵箇賊盡平明年獲季擴及其弟
偽相國驩國王季楷他賊盡平明年二月輔晟等班師
入京四月復命輔佩征夷將軍印出鎮十四年召還明

年命豐城侯李彬代鎮交人故好亂中官馬騏以採辦至大索境內珍寶人情騷動桀黠者鼓煽之大軍甫還即並起為亂陸那阮貞順州黎核潘強與土官同知陳可論判官阮昭千戶陳怱南靈州判官阮掇左平知縣范伯高縣丞武萬百戶陳已律等一時並反彬皆遣將討滅之而反者猶不止俄樂巡檢黎利四忙故知縣車綿之子三义安知府潘僚南靈州千戶陳順慶义安衛百戶陳直誠亦乘機作亂其他奸宄范軟起浮樂武貢

黃汝典起偈江儂文厯起卬溫陳木異起武定阮特起
快州吳巨來起善誓鄭公證黎姪起同利陶強起善才
丁宗老起大灣范玉起安老皆自署官爵殺將吏焚廬
舍有楊恭阮多者皆自稱王署其黨韋五譚興邦阮嘉
為太師平章與羣寇相倚而潘僚范玉尤猖獗僚者故
又安知府季祐子也嗣父職不堪馬騏虐遂反土官指
揮路文律千戶陳苔等從之玉為塗山寺僧自言天降
印劍遂僭稱羅平王紀元永寧與范善吳中黎行陶承

等為亂署為相國司空大將軍攻掠城邑彬東西征勦

日不暇給中朝以賊久未平十八年命榮昌伯陳智為

左參將助之又降敕責彬曰叛寇潘僚黎利車三儂文

歷等迄今未獲兵何時得息民何時得安宜廣為方畧

速奏蕩平彬惶恐督諸將追勦明年秋賊悉破滅惟黎

利不能得利初仕陳季擴為金吾將軍後歸正用為清

化府俄樂縣巡檢邑邑不得志及大軍還遂反僭稱平

定王以弟石為相國與其黨段莽范柳范晏等放兵肆

掠官軍討之生禽晏等利遁去久之出據可藍柵行劫諸將方政師祐勦獲其僞將軍阮箇立等利逃匿老撾及政等還利潛出殺玉局巡檢已復出掠磊江每追擊輒遁去及羣盜盡滅利益深匿彬奏言利竄老撾老撾請官軍毋入當盡發所部兵捕利今久不遣情叵測帝疑老撾匿賊令彬送其使臣至京詰問老撾乃逐利二十年春彬卒詔智代彬二十一年智追利於寧化州車來縣敗之利復遠竄明年秋智奏利初逃老撾後被逐

歸瑰縣官軍進擊其頭目范仰等已率男婦千六百人
降利雖求撫願以所部來歸而止俄樂不出造軍器未
已必當進兵奏至會仁宗以踐阼大赦天下因敕智善
撫之而利已寇茶籠州敗方政軍殺指揮伍雲利未叛
時與鎮守中官山壽善至是壽還朝力言利與已相信
今往諭之必來歸帝曰此賊狡詐若為所紿則其勢益
熾不易制也壽叩頭言如臣往諭而利不來臣當萬死
帝顧之遣壽齎敕授利清化知府慰諭甚至敕甫降利

已寇清化殺都指揮陳忠利得救無降意即借撫愚守
臣佯言俟秋涼赴官而寇掠不已時洪熙改元鑄將軍
印分頒邊將智得征夷副將軍印又命安平伯李安往
佐之智素無將畧憚賊因借撫以愚中朝且與方政迂
遂頓兵不進賊益無所忌再圍茶籠智等坐視不救閱
七月城中糧盡巡按御史以聞奏至而仁宗崩宣宗初
即位敕責智及三司官智等不為意茶籠遂陷知府琴
彭死之尚書掌布按二司陳洽言利雖乞降內攜貳既

陷茶籠復結玉麻土官老撾酋長與之同惡始言俟秋
涼今秋已過復言與參政梁汝笏有怨乞改授茶籠州
而遣逆黨潘僚路文律等往嘉興廣威諸州招集徒衆
勢日滋蔓乞命總兵者速行勦滅奏上為降敕切責期
來春平賊智始懼與政薄可留闕敗還至茶籠又敗政
勇而寡謀智懦而多忌素不相能而山壽專招撫擁兵
又安不救是以屢敗宣德元年春事聞復降敕切責時
渠魁未平而小寇蠭起美留潘可利助逆宣化周莊太

原黃菴等結雲南寧遠州紅衣賊大掠帝敕沐晟勦寧
遠又發西南諸衛軍萬五千弩手三千赴交趾且敕老
撾不得容叛人四月命成山侯王通為征夷將軍都督
馬瑛為參將往討黎利削陳智方政職充為事官通未
至賊犯清化政不出戰都指揮王演擊敗之詔大赦交
趾罪人黎利潘僚降亦授職停採辦金銀香貨冀以弭
賊而賊無悛心政督諸軍進討李安及都指揮于瓚謝
鳳薛聚朱廣等先奔政由此敗俱謫為事官立功贖罪

未幾智遣都指揮袁亮擊賊黎善於廣威州欲渡河土
官何加仇言有伏亮不從遣指揮陶森錢輔等渡河中
伏並死亮亦被執善遂分兵三道犯交州其攻下關者
為都督陳濬所敗攻邊江小門者為李安所敗善夜走
通聞之亦分兵為三道出擊馬瑛敗賊清威至石室與通
會俱至應平寧橋士卒行泥濘中遇伏兵大敗尚書陳
洽死馬通亦中脇還利在乂安聞之鼓行至清潭攻北
江進圍東關通素無戰功以父真死事封朝廷不知其

庸劣誤用之一戰而敗心膽皆喪舉動乖張不奉朝命擅割清化以南地予賊盡撤官吏軍民還東關惟清化知府羅通不從利移兵攻之不下賊分兵萬人圍隘留關百戶萬琮奮擊乃退帝聞通敗大駭命安遠侯柳升為總兵官保定伯梁銘副之督師赴討又命沐晟為征南將軍興安伯徐亨新寧伯譚忠為左右副將軍從雲南進兵兩軍共七萬餘人復敕通固守侯升二年春利犯交州通與戰斬偽太監黎秘及太尉司徒司空等官

獲首級萬計利破膽奔遁諸將請乘勢追之通逗留三日賊知其怯復立寨濬濠四出剽掠三月復發三萬三千人從柳升沐晟征討賊分兵圍邛溫都指揮孫聚力拒之先是賊以昌江為大軍往來要道發衆八萬餘人來攻都指揮李任等力拒殺賊甚衆閏九月諸將觀望不救賊懼升大軍至攻益力夏四月城陷任死之時賊圍交州久通閉城不敢出賊益易之致書請和通欲許之集衆議按察使楊時習曰奉命討賊與之和而擅退

師何以逃罪通怒厲聲叱之衆不敢言遂以利書聞升奉命久俟諸軍集九月始抵隘留闕利既與通有成言乃詭稱陳氏有後率大小頭目具書詣升軍乞罷兵立陳氏裔升不啓封遣使奏聞無何升進薄倒馬坡陷歿後軍相繼盡歿通聞懼甚大集軍民官吏出下哨河立壇與利盟誓約退師遂遣官偕賊使奉表及方物進獻沐晟軍至水尾造船將進聞通已議和亦引退賊乘之大敗鴻臚寺進賊與升書畧言高皇帝龍飛安南首朝

貢特蒙褒賞錫以玉章後黎賊篡弒太宗皇帝興師討滅求陳氏子孫陳族避禍方遠竄故無從訪求今有遺嗣嵩潛身老嫗二十年本國人民不忘先王遺澤已訪得之倘蒙轉達黼宸循太宗皇帝繼絕明詔還其爵土匪獨陳氏一宗實蠻邦億萬生民之幸帝得書頷之明日嵩表亦至稱臣嵩先王暉三世嫡孫其詞與利書畧同帝心知其詐欲藉此息兵遂納其言初帝嗣位與楊士奇楊榮語交趾事將欲棄之至是以表示廷臣諭以

罷兵息民意士竒榮力贊之惟蹇義夏原吉不可然帝
意已決廷臣不敢爭十一月朔命禮部左侍郎李琦工
部右侍郎羅汝敬為正使右通政黃驥鴻臚卿徐永達
為副使齎詔撫諭安南人民盡赦其罪與之更新令具
陳氏後人之實以聞因刺利以興滅繼絕之意并諭通
及三司官盡撤軍民北還詔未至通已棄交趾由陸路
還廣西中官山壽馬騏及三司守令由水路還欽州凡
得還者止八萬六千人為賊所殺及拘留者不可勝計

天下舉疾通棄地殃民而帝不怒也三年夏通等至京
文武諸臣合奏其罪廷鞫具服乃與陳智馬瑛方政山
壽馬騏及布政使弋謙俱論死下獄籍其家帝終不誅
長繫待決而已騏恣虐激變罪尤重而謙實無罪皆同
論時議非之廷臣復劾沐晟徐亨譚忠逗留及喪師辱
國罪帝不問琦等還朝利遣使奉表謝恩詭言嵩於正
月物故陳氏子孫絕國人推利守其國謹俟朝命帝亦
知其詐不欲遽封復遣汝敬永達諭利及其下令訪陳

氏并盡還官吏人民及其眷屬明年春汝敬等還利復言陳氏無遺種請別命因貢方物及代身金人又言臣九歲女遭亂離散後知馬騏攜歸充宮婢臣不勝兒女私冒昧以請帝心知陳氏即有後利必不言然以封利無名復命琦汝敬敕諭再訪且以利女病死告之五年春琦等還利遣使貢金銀器方物復飾詞具奏并具頭目耆老奏請令利攝國政使臣歸帝復以訪陳氏裔還中國遺民二事諭之詞不甚堅明年夏利遣使謝罪以

二事飾詞對復進頭目者老奏仍為利乞封帝乃許之
命禮部右侍郎章敞右通政徐琦齎敕印命利權署安
南國事利遣使齎表及金銀器方物隨敞等入貢七年
二月達京師比還利及使臣皆有賜明年八月來貢命
兵部侍郎徐琦等與其使偕行諭以順天保民之道是
年利卒利雖受敕命其居國稱帝紀元順天建東西二
都分十三道曰山南京北山西海陽安邦諒山太原明
光諒化清華乂安順化廣南各設承政司憲察司總兵

使司擬中國三司東都在交州府西都在清華府置百

官設學校以經義詩賦二科取士彬彬有華風焉僭位

六年私諡太祖子麟繼麟一名龍自是其君長皆有二

名以一名奏天朝貢獻不絕如常制麟遣使告訃命侍

郎章敞行人侯璉敕麟權署國事明年遣使入貢謝恩

正統元年四月以宣宗賓天遣使進香又以英宗登極

及尊上太皇太后皇太后位號並遣使表賀貢方物閏

六月復貢帝以陳氏宗支既絕欲使麟正位下廷議咸

以為宜乃命兵部右侍郎李郁左通政奈亨齎敕印封
麟為安南國王明年遣使入貢謝恩時安南思郎州土
官攻掠廣西安平思陵二州據二峒二十一村帝命給
事中湯鼎行人高寅敕麟還侵地麟奉命遣使謝罪而
訴安平思陵土官侵掠思郎帝令守臣嚴飭七年安南
貢使還令齎皮弁冠服金織襲衣賜其王是歲麟卒私
諡太宗改元二紹平六年大寶三年子濬繼一名基隆
遣使告訃命光祿少卿宋傑兵科都給事中薛謙持節

冊封為國王濬遣將侵占城奪新州港據其王摩訶賁該以歸帝為立新王摩訶賁來救安南使諭濬歸其故王濬不奉詔侵掠人口至三萬三千餘占城入訴景泰元年賜敕戒濬迄不奉詔四年遣使賀冊立皇太子天順元年遣使入貢乞賜袞冕如朝鮮例不從其使者乞以土物易書籍藥材從之二年遣使賀英宗復辟三年十月其庶兄諒山王琮弒之而自立濬改元二大利十一年延寧六年私諡仁宗琮一名宜民篡位九月改元

天與為國人所誅貶厲德侯以濬弟灝繼灝一名思誠
初琮弒濬以游湖溺死奏天朝不知將遣官弔祭琮恐
天使至覺其情言禮不弔溺不敢煩天使帝即已之使
者言濬無子請封琮命通政參議尹旻禮科給事中王
豫往封未入境聞琮已誅灝嗣位即却還灝連遣使朝
貢請封禮官疑其詐請命廣西守臣覈實奏請從之使
臣言禮生有封死有祭今濬死既白請賜祭乃命行人
往祭六年二月命侍讀學士錢溥給事中王豫封灝為

國王憲宗踐阼命尚寶卿凌信行人邵震賜王及妃綵幣灝遣使來貢因請冕服不從但賜皮弁冠服及紗帽犀帶成化元年八月以英宗賓天遣使進香命赴裕陵行禮灝雄桀自負國富兵強輒坐大四年侵據廣西憑祥帝聞命守臣謹備之七年破占城執其王盤羅茶全逾三年又破之執其王盤羅茶悅遂改其國為交南州設兵戍守安南貢道故由廣西時雲南鎮守中官錢能貪恣遣指揮郭景齋敕取其貨灝素欲窺雲南遂以解

送廣西龍州罪人為詞隨景假道雲南入京索夫六百
餘且發兵繼其後雲南大擾兵部言雲南非貢道龍州
罪人宜解廣西不必赴京乃令守臣檄諭且嚴邊備瀨
既得憑祥滅占城遂侵廣東瓊雷盜珠池廣西之龍州
右平雲南之臨安廣南鎮安亦數告警詔守臣詰之輒
詭詞對廟堂務姑息雖屢降敕諭無屬詞瀨益玩侮無
畏忌言占城王盤羅茶全侵化州道為其弟盤羅茶悅
所弑因自立及將受封又為子茶質苕所弑其國自亂

非臣瀨罪中朝知其詐不能詰但勸令還其土宇瀨奏
言占城非沃壤家鮮積貯野絕桑麻山無金寶之收海
乏魚鹽之利止產象牙犀角烏木沉香得其地不可居
得其民不可使得其貨不足富此臣不侵奪占城故也
明詔令臣復其土宇乞遣朝使申畫郊圻俾兩國邊陲
休息臣不勝至願時占城久為所據而其詞誕如此先
是安南入貢多攜私物道憑祥龍州乏人轉運輒興讐
讐會遣使賀冊立皇太子有詔禁飭之十五年冬瀨遣

兵八百餘人越雲南蒙自界聲言捕盜擅結營築室以居守臣力止之始退瀨既破占城志意益廣親督兵九萬開山為三道攻破哀牢侵老撾復大破之殺宣慰刀板雅蘭掌父子三人其季子怕雅賽走八百以免瀨復積糧練兵頗偽敕於車里徵其兵合攻八百將士暴死者數千咸言為雷霆所擊八百乃遏其歸路襲殺萬餘人瀨始引還帝下廷議請令廣西布政司檄瀨斂兵雲南兩廣守臣戒邊備而已既而瀨言未侵老撾且不知

八百疆宇何在語甚誑誕帝復慰諭之迄不奉命十七
年秋滿剌加亦以被侵告帝敕使諭令睦鄰保國未幾
使臣入貢請如暹羅爪哇例賜冠帶許之不為例孝宗
踐阼命侍讀劉戩詔諭其國其使臣來貢以大喪免引
奏弘治三年時占城王古來以天朝力得還國復懇安
南見侵兵部尚書馬文升召安南使臣曰歸諭爾主各
保疆土享太平不然朝廷一旦赫然震怒天兵壓境如
永樂朝事爾主得無悔乎安南自是有所畏十年瀕卒

私諡聖宗其改元二光順十年洪德二十八年子暉繼
一名錯遣使告訃命行人徐鉉往祭尋賜暉皮弁服金
犀帶其使臣言國主受王封賜服與臣下無別乞改賜
禮官言安南名為王實中國臣也嗣王新立必賜皮弁
冠服使不失主宰一國之尊及賜一品常服俾不忘臣
事中國之義今所請紊亂祖制不可許然此非使臣罪
乃通事者導之妄奏宜懲帝特宥之十七年暉卒私諡
憲宗其改元曰景統子湊繼一名敬甫七月而卒私諡

肅宗弟誼繼一名璿武宗踐阼命修撰倫文叙給事中
張宏至詔諭其國誼亦遣使告訃命官致祭如常儀正
德元年冊為王誼寵任母黨阮种阮伯勝兄弟恣行威
虐屠戮宗親酖殺祖母种等怙寵竊權四年逼誼自殺
擁立其弟伯勝敗誼為厲愍王國人黎廣等討誅之立
瀨孫暉改諡誼威穆帝誼在位四年改元端慶暉一名
瀨七年受封多行不義十一年社堂燒香官陳暘與二
子暘昇作亂殺暉而自立詭言前王陳氏後仍稱大虞

皇帝改元應天貶暉為靈隱王暉臣都齋力士莫登庸初
附暉後與黎氏大臣阮宏裕等起兵討之暉敗走獲昺
及其黨陳璘等暉與昇奔諒山道據長寧太原清節三
府自保登庸等乃共立暉兄灝之子諲改諡暉襄翼帝
暉在位七年改元洪順諲將請封因國亂不果以登庸
有功封武川伯總水陸諸軍既握兵柄潛蓄異志黎氏
臣鄭綏以諲徒擁虛位別立其族子酉榜發兵攻都城
諲出走登庸擊破綏兵捕酉榜殺之益恃功專恣遂逼

妻諱母迎諱歸自為太傅仁國公十六年率兵攻陳曷
曷敗走死嘉靖元年登庸自稱安興王謀弑諱諱母以
告乃與其臣杜溫潤間行以免居於清華登庸立其庶
弟慮遷居海東長慶府世宗踐阼命編修孫承恩給事
中俞敦詔諭其國至龍州聞其國大亂道不通乃却還
四年夏諱遣使間道通貢并請封為登庸所阻明年春
登庸賂欽州判官唐清為慮求封總督張嶺逮清死於
獄六年登庸令其黨范嘉謨偽為慮禪詔篡其位改元

明德立子方瀛為皇太子旋酖殺廢諡為恭皇帝踰年遣使來貢至諒山城被攻而還九年登庸禪位於方瀛自稱太上皇移居都齋海陽為方瀛外援作大誥五十條頒之國中方瀛改元大正其年九月黎諲卒於清華國亡十五年冬皇子生當頒詔安南禮官夏言言安南不貢已二十年兩廣守臣謂黎諲黎廢均非黎暲應立之嫡莫登庸陳暠俱彼國篡逆之臣宜遣官按問求罪人主名且前使既以道阻不通今宜暫停使命帝以

安南叛逆昭然宜急遣官往勘命言會兵部議征討言
及本兵張瓚等力言逆臣篡主奪國朝貢不修決宜致
討乞先遣錦衣官二人往覈其實敕兩廣雲南守臣整
兵積餉以俟師期制可乃命千戶陶鳳儀鄭璽等分往
廣西雲南詰罪人主名敕四川貴州湖廣福建江西守
臣預備兵食候征調戶部侍郎唐胄上疏力陳用兵七
不可語詳其傳中末言安南雖亂猶頻奉表箋具方物
款關求入守臣以其姓名不符拒之是彼欲貢不得非

負固不貢也章下兵部亦以為然命俟勘官還更議十
六年安南黎寧遣人鄭惟僚等赴京備陳登庸篡弒
狀言寧即諱子諱卒國人立寧為世孫權主國事屢馳
書邊臣告難俱為登庸邀殺乞興師問罪亟除國賊時
嚴嵩掌禮部謂其言未可盡信請羈之待勘官回奏從
之尋名鳳儀等還命禮兵二部會廷臣議列登庸十大
罪請大振宸斷尅期徂征乃起右都御史毛伯溫於家
參贊軍務命戶部侍郎胡璉高公韶先馳雲貴兩廣調

度軍食以都督僉事江桓牛桓為左右副總兵督軍征討其大將需後命兵部復奉詔條用兵機宜十二事獨侍郎潘珍持不可抗疏切諫帝怒褫其職兩廣總督潘旦亦馳疏請停前命言朝廷方興問罪之師登庸即有求貢之使宜因而許之戒嚴觀變以待彼國之自定嚴嵩張瓚窺帝旨力言不可宥且言黎寧在清都圖恢復而且謂彼國俱定上表求貢決不可許旦疏遂寢五月伯溫至京奏上方畧六事以旦不可共事請易之優旨

褒答及兵部議上帝意忽中變謂黎寧誠偽未審令三方守臣從宜撫勦參贊督餉大臣俱暫停且調用以張經代之時御史徐九臯給事中謝廷范以修省陳言亦請罷征南之師八月雲南巡撫汪文盛以獲登庸間諜及所撰偽大誥上聞帝震怒命守臣仍遵前詔征討時文盛招納黎氏舊臣武文淵得其進兵地圖謂登庸必可破遂上之朝廣東按臣余光言莫之篡黎猶黎之篡陳不足深較但當罪其不庭責以稱臣修貢不必遠征

疲敝中國臣已遣使宣諭彼如來歸宜因以撫納帝以
光輕率奪祿一年文盛即傳檄安南登庸能束身歸命
籍上輿圖待以不死於是登庸父子遣使奉表乞降且
投牒文盛及黔國公沐朝輔具述黎氏衰亂陳嵩叛逆
已與方瀛有功為國人歸附所有土地已載一統志中
乞貫其罪修貢如制朝輔等以十七年三月奏聞而黎
寧承前詔懼天朝竟納其降備以本國篡弒始末及軍
馬之數水陸進兵道里來上俱下兵部集廷臣議僉言

莫氏罪不可赦亟宜進師請以原推咸寧侯仇鸞總督
軍務伯溫仍為參贊從之張經上言安南進兵之道有
六兵當用三十萬一歲之餉當用百六十萬造舟市馬
制器犒軍諸費又須七十餘萬況我調大衆涉炎海與
彼勞逸殊勢不可不審處也疏方上欽州知州林希元
又力陳登庸可取狀兵部不能決復請廷議及議上帝
不悅曰朕聞卿士大夫私議咸謂不當興師爾等職司
邦政漫無主持悉委之會議既不協心謀國其已之鸞

伯溫別用十八年冊立皇太子當頒詔安南特起黃綰
為禮部尚書學士張治副之往使其國命甫下方瀛遣
使上表降並籍其土地戶口聽天朝處分凡為府五十
有三州四十有九縣一百七十有六帝納之下禮兵二
部協議至七月綰猶未行以忤旨落職遂停使命初征
討之議發自夏言帝既責綰因發怒曰安南事本一人
倡衆皆隨之乃訕上聽言計共作慢詞此國應棄應討
宜有定議兵部即集議以聞於是瓚及廷臣惶懼請如

前詔仍遣鸞伯溫南征如登庸父子束手歸命無異心
則待以不死從之登庸聞大喜十九年伯溫等抵廣西
傳檄諭以納款宥罪意時方瀛已卒登庸即遣使請降
十一月率從子文明及部目四十二人入鎮南關囚首
徒跣匍匐叩頭壇上進降表伯溫稱詔赦之復詣軍門
匍匐再拜上土地軍民籍請奉正朔永為藩臣伯溫等
宣示威德令歸國侯命疏聞帝大喜命削安南國為安
南都統使司授登庸都統使秩從二品銀印舊所僭擬

制度悉除去改其十三道為十三宣撫司各設宣撫同知副使僉事聽都統點陟廣西歲給大統歷仍三歲一貢以為常更令覈黎寧真偽果黎氏後割所據四府奉其祀事否則已之制下登庸悚惕受命二十二年登庸卒方瀛子福海嗣遣宣撫同知阮敬典等來朝二十五年福海卒子宏漢嗣初登庸以石室人阮敬為義子封西寧侯敬有女嫁方瀛次子敬典因與方瀛妻武氏通得專兵柄宏漢立方五歲敬益專恣用事登庸次子正

中及文明避之都齋其同輩阮如桂范子儀等亦避居
田里敬舉兵逼都齋正中如桂子儀等禦之不勝正中
文明率家屬奔欽州子儀收殘卒遁海東敬詭稱宏漢
歿以迎立正中為詞犯欽州為叅將俞大猷所敗誅死
宏漢初立時遣使黎光賁來貢至南寧守臣以聞禮官
以其國內亂名分未定止來使勿進而令守臣覈所當
立者至三十年事白命授宏漢都統使赴闕領牒會部
目黎伯驪與黎寧臣鄭檢合兵來攻宏漢奔海陽不克

赴光賁等留南寧且十五年其僭來使人物故大半宏
漢祈守臣代請詔許入京其都統告身仍俟宏漢赴闕
則給四十三年宏漢卒子茂洽嗣萬歷元年授都統使
三年遣使謝恩賀即位進方物又補累年所缺之貢時
莫氏漸衰黎氏復興互相構兵其國益多故始黎寧之
據清華也仍僭帝號以嘉靖九年改元元和居四年為
登庸所攻竄占城界國人立其弟憲改元光照十五年
廉知寧所在迎歸清華後遷於漆馬江寧卒其臣鄭檢

立寧子寵寵卒無子國人共立黎暉四世孫維邦維邦
卒檢子松立其子維潭世居清華自為一國萬歷十九
年維潭漸強舉兵攻茂洽茂洽敗奔嘉林縣明年冬松
誘土人內應襲殺茂洽奪其都統使印親黨多遇害有
莫敦讓者奔防城告難總督陳渠以聞松復禽敦讓勢
益張茂洽子敬恭與宗人履遜等奔廣西思陵州莫履
機奔欽州獨莫敬邦有衆十餘萬起京北道擊走黎黨
范拔萃范百祿諸軍敦讓得復歸衆乃推敬邦署都統

諸流寓思陵欽州者悉還黎兵攻南策州敬邦被殺莫氏勢益衰敬恭敬用屯諒山高平敬璋屯東海新安懼黎兵追索竄至龍州憑祥界令土官列狀告當事維潭亦叩關求通貢識以國王金印二十一年廣西巡撫陳大科等上言蠻邦易姓如奕棋不當以彼之叛服為順逆止當以彼之叛我服我為順逆今維潭雖圖恢復而茂洽固天朝外臣也安得不請命而擱然戮之竊謂黎氏擅興之罪不可不問莫氏子遺之緒亦不可不存倘

如先朝故事聽黎氏納款而仍存莫氏比諸漆馬江亦
不剪其祀於計為便廷議如其言明年大科方遣官往
察敬用即遣使叩軍門告難且乞兵明年秋維潭亦遣
使謝罪求款時大科已為兩廣總督與廣西巡撫戴耀
並以屬左江副使楊寅秋寅秋竊計曰不拒黎亦不棄
莫吾策定矣兩遣官往問以敬恭等願居高平來告而
維潭求款之使亦數至寅秋乃與之期具報督撫會敬
璋率衆赴永安為黎氏兵擊敗海東新安地盡失於是

款議益決時維潭圖恢復名不欲以登庸自處無束身
入關意寅秋復遣官諭之與使者來報如約至期忽言
於關吏曰士卒饑病款儀未備且莫氏吾讐也棲之高
平未敢聞命遂中宵遁去大科等疏聞謂其臣鄭松專
權所致維潭復遣使叩關白己非遁大科等再遣官諭
之維潭聽命二十五年遣使請期寅秋示以四月屆期
維潭至關外譯者詰以六事首擅殺茂洽曰復讐急不
遑請命次維潭宗派曰世孫也祖暉天朝曾錫命次鄭

松曰此黎氏世臣非亂黎氏也然則何甯遁曰以儀物之不戒非遁也何以用王章曰權倣為之立銷矣惟割高平居莫氏猶相持不絕復諭之曰均貢臣也黎昔可棲漆馬江莫獨不可棲高平乎乃聽命授以款關儀節俾習之維潭率其下入關謁御幄一如登庸舊儀退謁寅秋請用賓主禮不從四拜成禮而退安南復定詔授維潭都統使頒歷奉貢一如莫氏故事先是黎利及登庸進代身金人皆囚首面縛維潭以恢復名正獨立而

肅容當事嫌其倨令改製乃為俯伏狀鐫其背曰安南
黎氏世孫臣黎維潭不得蒲伏天門恭進代身金人悔
罪乞恩自是安南復為黎氏有而莫氏但保高平一郡
二十七年維潭卒子維新嗣鄭松專其柄會叛酋潘彥
搆亂維新與松移保清化三十四年遣使入貢命授都
統使時莫氏宗黨多竄處海隅往往僭稱公侯伯名號
侵軼邊境維新亦不能制守臣檄問數發兵夾勦雖應
時破滅而邊方頗受其害維新卒子維祺嗣天啓四年

發兵擊莫敬寬克之殺其長子掠其妻妾及少子以歸
敬寬與次子逃入山中復回高平勢益弱然迄明之世
二姓分據終不能歸一云安南都會在交州即唐都護
治所其疆域東距海西接老撾南渡海即占城北連廣
西之思明南寧雲南之臨安元江土膏腴氣候熱穀歲
二稔人性獷悍驩演二州多文學交愛二州多個儻士
較他方為異

明史卷三百二十一

欽定四庫全書

明史卷三百二十一

安南傳其婿陳日炬

臣章宗瀛按陳日炬宋史作日

照元史及識大錄吾學編作日𠵽此又作日炬諸書

互異謹識

安南傳取他道至北江府新福縣 舊本作江北

臣

章宗瀛按一統志有北江府朱睦㮮所撰張輔傳並作北江傳因下有大發江北民誤倒其文謹據改

安南傳十五府分轄三十六州

臣章宗瀛按識大錄

作十七府無演州有升華又有太原宣化與此不同
通鑑紀事王世貞紀葉向高志吾學編朱睦㮮撰張
輔傳亦俱作十七府謹附考

安南傳及容貌魁岸語言便利

臣章宗瀛按吾學編

云容貌魁偉語言便利傳脫語言二字而以魁岸便
利相連成文於義殊為不順謹據添二字并刪下二
字以符勻刻

安南傳特阮師等推簡定為越上皇

臣章宗瀛按張

輔傳簡定已僭稱為上皇定本僭國為越故以國號冠上皇也陳季擴別為一姓不當如前黎季犛之傳其子奎因自稱為太上皇也傳作太字誤謹據改

安南傳輔軍至乂安上皇

臣章宗瀛按乂安府所領

有土皇縣獻徵錄輔傳作土皇此誤土為上謹據改

安南傳有楊恭阮多者皆自稱王

臣章宗瀛按楊恭

舊本誤作楊公謹據李彬傳改

安南傳利在乂安聞之

臣章宗瀛按利在清化王通

傳及通鑑紀事並作利在乂安是時清化未破下文
明言羅通不從則利何由得在清化也舊本乂安誤
清化謹據改

安南傳張輔進政平

臣章宗瀛按張輔傳進至政平

明言羅通不從則利何由得在清化也舊本乂安誤
清化謹據改

安南傳尚寶卿凌信

臣章宗瀛按凌信時以尚寶卿

出使傳誤寶為書謹據明實錄改

安南傳時雲南鎮守中官錢能貪恣

臣章宗瀛按錢

能在雲南私與瀨通闌結諸蠻奸宄驛騷雲南幾危
巡撫王恕盡發其黨乃止見葉向高安南志謹附考

安南傳明臣都齋力士莫登庸

臣章宗瀛按通鑑紀

事莫登庸本都齋漁人有勇力傳中下文亦言移居
都齋海陽則都齋係安南地名舊本脫齋字謹增入
安南傳乃共立暕兄灝之子諱

臣章宗瀛按識大錄

灝生二子長暉次昭暉生敬誼昭生灝及濬灝又生
二子曰椅曰椿濬即暉椅即諛也據此則諛為暉兄
灝之子且傳中本以暉為灝之孫今又以灝為暉兄
殊屬舛誤謹據改 舊本灝誤灝謹據改

安南傳方瀛子福海嗣

臣章宗瀛按福海不能輯衆

為黎寧所逐居南海上朝廷亦置不問久之福海子
宏瀛復振卒逐黎氏有其國見通鑑紀事謹附考

安南傳茂洽敗奔嘉林

臣章宗瀛按一統志安南北

江府領嘉林縣傳誤嘉為喜謹據改



明史卷三百二十一考證



總校官編修臣吳紹濬

欽定四庫全書叢要

史部
明史卷三百二十三

詳校官中書臣劉源溥



欽定四庫全書薈要卷六千九百十五

史部

明史卷三百二十二

大學士張廷玉等奉 敕修

傳第二百一十

外國三

日本

日本古倭奴國唐咸亨初改日本以近東海日出而名也地環海惟東北限大山有五畿七道三島共一百十

五州統五百八十七郡其小國數十皆服屬焉國小者
百里大不過五百里戶小者千多不過一二萬國主世
以王為姓羣臣亦世官宋以前皆通中國朝貢不絕事
具前史惟元世祖數遣使趙良弼招之不至乃命忻都
范文虎等帥舟師十萬征之至五龍山遭暴風軍盡沒
後屢招不至終元世未相通也明興高皇帝即位方國
珍張士誠相繼誅服諸豪亡命往往糾島人入寇山東
濱海州縣洪武二年三月帝遣行人楊載詔諭其國且

詰以入寇之故謂宜朝則來庭不則修兵自固倘必為
寇盜即命將徂征耳王其圖之日本王良懷不奉命復
寇山東轉掠溫台明州旁海民遂寇福建沿海郡三年
三月又遣萊州府同知趙秩責讓之泛海至析木崖入
其境守關者拒弗納秩以書抵良懷良懷延秩入諭以
中國威德而詔書有責其不臣語良懷曰吾國雖處扶
桑東未嘗不慕中國惟蒙古與我等夷乃欲臣妾我我
先王不服乃使其臣趙姓者誅我以好語語未既水軍

十萬列海岸矣以天之靈雷霆波濤一時軍盡覆今新
天子帝中夏天使亦趙姓豈良弼裔耶亦將誅我以好
語而襲我也目左右將兵之秩不為動徐曰我大明天
子神聖文武非蒙古比我亦非蒙古使者後能兵兵我
良懷氣沮下堂延秩禮遇甚優遣其僧祖來奉表稱臣
貢馬及方物且送還明台二郡被掠人口七十餘以四
年十月至京太祖嘉之宴賚其使者念其俗佞佛可以
西方教誘之也乃命僧祖闡克勤等八人送使者還國

賜良懷大統歷及文綺紗羅是年掠溫州五年寇海鹽
澈浦又寇福建海上諸郡六年以於顯為總兵官出海
巡倭倭寇萊登祖闡等既至為其國演教其國人頗敬
信而王則傲慢無禮拘之二年以七年五月還京倭寇
膠州時良懷年少有持明者與之爭立國內亂是年七
月其大臣遣僧宣間溪等齎書上中書省貢馬及方物
而無表帝命却之仍賜其使者遣還未幾其別島守臣
氏久遣僧奉表來貢帝以無國王之命且不奉正朔亦

却之而賜其使者命禮臣移牒責以越分私貢之罪又以頻入寇掠命一書移牒責之乃以九年四月遣僧圭廷用等來貢且謝罪帝惡表詞不誠降詔戒諭諭宴賚使者如制十二年來貢十三年復貢無表但持其征夷將軍源義滿奉丞相書書辭又倨乃却其貢遣使齎詔譙讓十四年復來貢帝再却之命禮官移書責其王并責其征夷將軍示以欲征之意良懷上言臣聞三皇立極五帝禪宗惟中華之有主豈夷狄而無君乾坤浩蕩

非一主之獨權宇宙寬洪作諸邦以分守蓋天下者乃天下之天下非一人之天下也臣居遠弱之倭徧小之國城池不滿六十封疆不足三千尚存知足之心陛下作中華之主為萬乘之君城池數千餘封疆百萬里猶有不足之心常起滅絕之意夫天發殺機移星換宿地發殺機龍蛇走陸人發殺機天地反覆昔堯舜有德四海來賓湯武施仁八方奉貢臣聞天人有興戰之策小邦亦有禦敵之圖論文有孔孟道德之文章論武有孫

吳韜略之兵法又聞陛下選股肱之將起精銳之師來
侵臣境水澤之地山海之洲自有其備豈肯跪途而奉
之乎順之未必其生逆之未必其死相逢賀蘭山前聊
以博戲臣何懼哉倘君勝臣負且滿上國之意設臣勝
君負反作小邦之羞自古講和為上罷戰為彊免生靈
之塗炭拯黎庶之艱辛特遣使臣敬叩丹陛惟上國圖
之帝得表愠甚終鑑蒙古之轍不加兵也十六年倭寇
金鄉平陽十九年遣使來貢却之明年命江夏侯周德

興往福建濱海四郡相視形勢衛所城不當要害者移
置之民戶三丁取一以充戍卒乃築城一十六增巡檢
司四十五得卒萬五千餘人又命信國公湯和行視浙
東西諸郡整飭海防乃築城五十九民戶四丁以上者
以一為戍卒得五萬八千七百餘人分戍諸衛海防大
飭閏六月命福建備海舟百艘廣東倍之以九月會浙
江捕倭既而不行先是胡惟庸謀逆欲藉日本為助乃
厚結寧波衛指揮林賢佯奏賢罪謫居日本令交通其

君臣尋奏復賢職遣使召之密致書其王借兵助已賢
還其王遣僧如瑤率兵卒四百餘人詐稱入貢且獻巨
燭藏火藥刀劍其中既至而惟庸已敗計不行帝亦未
知其狡謀也越數年其事始露乃族賢而怒日本特甚
決意絕之專以防海為務然其時王子藤祐壽者來入
國學帝猶善待之二十四年五月特授觀察使留之京
師後著祖訓列不征之國十五日本與焉自是朝貢不
至而海上之警亦漸息成祖即位遣使以登極詔詔諭其

國永樂元年又遣左通政趙居任行人張洪偕僧道成往將行而其貢使已達寧波禮官李至剛奏故事番使入中國不得私攜兵器鬻民宜敕所司覈其舶諸犯禁者悉籍送京師帝曰外夷修貢履險蹈危來遠所費實多有所齎以助資斧亦人情豈可繫拘以禁令至其兵器亦准時直市之毋阻向化十月使者至上王源道義表及貢物帝厚禮之遣官偕其使還賚道義冠服龜鈕金章及錦綺紗羅明年十一月來賀冊立皇太子時對

馬臺岐諸島賊掠濱海居民因諭其王捕之王發兵盡殲其衆繫其魁二十人以三年十一月獻於朝且修貢帝益嘉其誠於是遣行人潘賜偕中官王進賜其王九章冕服及錢鈔錦綺加等而還其所獻之人令其國自治之使者至寧波盡置其人於甌丞殺之明年春遣僉都御史俞士吉齎璽書褒嘉賜賚優渥封其國之山為壽安鎮國之山御製碑文立其上六月使來謝賜冕服五年六年頻入貢且獻所獲海寇使還請賜仁孝皇后

所製勸善內訓二書即命各給百本十一月再貢十二月其國世子源義持遣使來告父喪命中官周全往祭賜諡恭獻且致賻又遣官齎敕封義持為日本國王時海上復以倭警告再遣官諭義持勦捕八年四月義持遣使謝恩尋獻所獲海寇帝嘉之明年二月復遣王進齎敕褒賚收市物貨其君臣謀沮進不使歸進潛登舶從他道遁還自是久不貢是年倭寇盟石十五年倭寇松門金鄉平陽有捕倭寇數十人至京者廷臣請正法

帝曰威之以刑不若懷之以德宜還之乃命刑部員外郎呂淵等齎敕責讓令悔罪自新中華人被掠者亦令送還明年四月其王遣使隨淵等來貢謂海寇旁午故貢使不能上達其無賴鼠竊者實非臣所知願宥罪容其朝貢帝以其詞順許之禮使者如故然海寇猶不絕十七年倭船入王家山島都督劉榮率精兵疾馳入望海埭賊數千人分乘二十舟直抵馬雄島進圍望海埭榮發伏出戰奇兵斷其歸路賊奔櫻桃園榮合兵攻之

斬首七百四十二生禽八百五十七名榮至京封廣寧
伯自是倭不敢窺遼東二十年倭寇象山宣德七年正
月帝念四方蕃國皆來朝獨日本久不貢命中官柴山
往琉球令其王轉諭日本賜之敕明年夏王源義教遣
使來帝報之賚白金綵幣秋復至十年十月以英宗嗣
位遣使來貢正統元年二月使者還賚王及妃銀幣四
月工部言宣德間日本諸國皆給信符勘合今改元伊
始例當更給從之四年五月倭船四十艘連破台州桃

渚寧波大嵩二千戶所又陷昌國衛大肆殺掠八年五月寇海寧先是洪熙時黃巖民周來保龍巖民鍾晉福困於徭役叛入倭倭每來寇為之鄉導至是導倭犯樂清先登岸偵伺俄倭去二人留村中丐食被獲置極刑梟其首於海上倭性黠時載方物戎器出沒海濱得間則張其戎器而肆掠不得則陳其方物而稱朝貢凡東南海濱患之景泰四年入貢至臨清掠居民偵有指揮往詰毆斃死所司請執治帝恐失遠人心不許先是永

樂初詔日本十年一貢人止二百船止二艘不得攜軍
器違者以寇論乃賜以二舟為入貢用後悉不如制宣
德初申定要約人毋過三百舟毋過三艘而倭人貪利
貢物外所攜私物增十倍例當給直禮官言宣德間所
貢硫黃蘇木刀扇漆器之屬估時直給錢鈔或折支布
帛為數無多然已大獲利今若仍舊制當給錢二十一
萬七千銀價如之宜大減其直給銀三萬四千七百有
奇從之使臣不悅請如舊制詔增錢萬猶以為少求增

賜物詔增布帛千五百終怏怏去天順初其王源義政以前使臣獲罪天朝蒙恩宥欲遣使謝罪而不敢自達移書朝鮮王令轉請朝鮮以聞廷議敕朝鮮覈實令擇老成識大體者充使不得仍前肆擾既而貢使亦不至成化四年夏乃遣使貢馬謝恩禮之如制其通事三人自言本寧波村民幼為賊掠市與日本今請便道省祭許之戒其勿同使臣至家引中國人下海十一月冬使臣清啟復來貢日嘗傷人於市有司請治其罪詔付清

啟奏言犯法者當用本國之刑容還國如法論治且自服不能鈴束之罪帝俱赦之自是使者益無忌十三年九月來貢求佛祖通紀諸書詔以法林珠林賜之使者述其王意請於常例外增賜命賜錢五萬貫二十年十一月復貢弘治九年三月王源義高遣使來還至濟寧其下復持刀殺人所司請罪之詔自今止許五十人入都餘留舟次嚴防禁焉十八年冬來貢時武宗已即位命如故事鑄金牌勘合給之正德四年冬來貢禮官言

明年正月大祀慶成宴朝鮮陪臣在殿東第七班日本
向無例請殿西第七班從之禮官又言日本貢物向用
舟三今止一所賜銀幣宜如其舟之數且無表文賜敕
與否請上裁命所司移文荅之五年春其王源義澄遣
使臣宋素卿來貢時劉瑾竊柄納其黃金千兩賜飛魚
服前所未有也素卿鄞縣朱氏子名縞幼習歌唱倭使
見悅之而縞叔澄負其直因以縞償至是充正使至蘇
州澄與相見後事覺法當死劉瑾庇之謂澄已自首並

獲免七年義澄使復來貢浙江守臣言今畿輔山東盜充斥恐使臣遇之為所掠請以貢物貯浙江官庫收其表文送京師禮官會兵部議請令南京守備官即所在宴賚遣歸附進方物時予全直毋阻遠人向化心從之嘉靖二年五月其貢使宗設抵寧波未幾素卿偕瑞佐復至互爭真偽素卿賄市舶太監賴恩宴時坐素卿於宗設上船後至又先為驗發宗設怒與之鬪殺瑞佐焚其舟追素卿至紹興城下素卿竄匿他所免凶黨還寧

波所過焚掠執指揮袁璉奪船出海都指揮劉錦追至
海上戰沒巡按御史歐珠以聞且言據素卿狀西海路
多羅氏義興者向屬日本統轄無入貢例因貢道必經
西海正德朝勘合為所奪我不得已以弘治朝勘合由
南海路起程比至寧波因詰其偽致啟釁章下禮部部
議素卿言未可信不宜聽入朝但釁啟宗設素卿之黨
被殺者多其前雖有投番罪已經先朝宥赦毋容問惟
宣諭素卿還國移咨其王令察勘合有無行究治帝已

報可御史熊蘭給事張紳交章言素卿罪重不可貸請
并治賴恩及海道副使張芹分守叅政朱鳴陽分巡副
使許完都指揮張浩閉關絕貢振中國之威寢狡寇之
計事方議行會宗設黨中林望古多羅逸出之舟為暴
風飄至朝鮮朝鮮人擊斬三十級生禽二賊以獻給事
中夏言因請逮赴浙江會所司與素卿雜治因遣給事
中劉穆御史王道往至四年獄成素卿及中林望古多
羅並論死繫獄久之皆瘐死時有琉球使臣鄭繩歸國

命傳諭日本以禽獻宗設還袁璉及海濱被掠之人否則閉關絕貢徐議征討九年琉球使臣蔡瀚者道經日本其王源義晴附表言向因本國多事干戈梗道正德勘合不達東都以故素卿捧弘治勘合行乞貸遣望并賜新勘合金印修貢如常禮官驗其文無印篆言倭謫詐難信宜敕琉球王傳諭仍遵前命十八年七月義晴貢使至寧波守臣以聞時不通貢者已十七年敕巡撫御史督同三司官覈果誠心效順如制遣送否則却回

且嚴居民交通之禁明年二月貢使碩鼎等至京申前請乞賜嘉靖新勘合還素卿及原留貢物部議勘合不可遽給務繳舊易新貢期限十年人不過百舟不過三餘不可許詔如議二十三年七月復來貢未及期且無表文部臣謂不當納却之其人利互市留海濱不去巡按御史高節請治沿海文武將吏罪嚴禁奸豪交通得旨允行而內地諸奸利其交易多為之囊橐終不能盡絕二十六年六月巡按御史楊九澤言浙江寧紹台溫

皆濱海界連福建福興漳泉諸郡有倭患雖設衛所城池及巡海副使備倭都指揮但海寇出沒無常兩地官弁不能統攝制禦為難請如往例特遣巡視重臣盡統海濱諸郡庶事歸一威令易行廷議稱善乃命左副都御史朱紱巡撫浙江兼制福興漳泉建寧五府軍事未幾其王義晴遣使周良等先期來貢用舟四人六百泊於海外以待明年貢期守臣沮之則以風為解十一月事聞帝以先期非制且人船越額敕守臣勒回十二月

倭賊患寧台二郡大肆殺掠二郡將吏並獲罪明年六月周良復求貢紈以聞禮部言日本貢期及舟與人數雖違制第表辭恭順去貢期亦不遠若槩加拒絕則航海之勞可憫若稍務含容則宗設素卿之事可鑑宜敕紈循十八年例起送五十人餘留嘉賓館量加犒賞諭令歸國若互市防守事宜在紈善處之報可紈力言五十人過少乃令百人赴都部議但賞百人餘罷勿賞良訴貢舟高大勢須五百人中國船舶入海往往藏匿島

中為寇故增一舟防寇非敢違制部議量增其賞且謂
百人之制彼國勢難遵行宜相其貢舟大小以施禁令
從之日本故有孝武兩朝勘合幾二百道使臣前此入
貢請易新者而令繳其舊至是良持弘治勘合十五道
言其餘為素卿子所竊捕之不獲正德勘合留十五道
為信而以四十道來還部議令異時悉繳舊乃許易新
亦報可當是時日本王雖入貢其各島諸倭歲常侵掠
濱海奸民又往往勾之統乃嚴為申禁獲交通者不俟

命輒以便宜斬之由是浙閩大姓素為倭內主者失利而怨統又數騰疏於朝顯言大姓通倭狀以故閩浙人皆惡之而閩尤甚巡按御史周亮閩產也上疏詆統請改巡撫為巡視以殺其權其黨在朝者左右之竟如其請又奪統官羅織其權殺罪統自殺自是不置巡撫者四年海禁復弛亂益滋甚祖制浙江設市舶提舉司以中官主之駐寧波海舶至則平其直制馭之權在上及世宗盡撤天下鎮守中官并撤市舶而濱海奸人遂操

其利初市猶商主之及嚴通番之禁遂移之貴官家負其直者愈甚索之急則以危言嚇之入或以好言紿之謂我終不負若直倭喪其貲不得返已大恨而大奸若汪直徐海陳東麻葉輩素窟其中以內地不得逞悉逸海島為主謀倭聽指揮誘之入寇海中巨盜遂襲倭服飾旗號逆分艘掠內地無不大利故倭患日劇於是廷議復設巡撫三十一年七月以僉都御史王忬任之而勢已不可撲滅明初沿海要地建衛城設戰船董以都

司巡視副使等官控制周密迨承平久船散伍虛及遇
警乃募漁船以資哨守兵非素練船非專業見寇舶至
輒望風逃匿而上又無統率御之以故賊帆所指無不
殘破三十二年三月汪直勾諸倭大舉入寇連艦數百
蔽海而至浙東西江南北濱海數千里同時告警破昌
國衛四月犯太倉破上海縣掠江陰攻乍浦八月劫金
山衛犯崇明及常熟嘉定三十三年正月自太倉掠蘇
州攻松江復趨江北薄通泰四月陷嘉善破崇明復薄

蘇州人崇德縣六月由吳江掠嘉興還屯柘林縱橫來往若入無人之境忬亦不能有所為未幾忬改撫大同以李天寵代又命兵部尚書張經總督軍務乃大徵兵四方協力進剿是時倭以川沙窪柘林為巢抄掠四出明年正月賊奪舟犯乍浦海寧陷崇德轉掠塘棲新市橫塘雙林等處攻德清縣五月復合新倭突犯嘉興至王江涇乃為經擊斬千九百餘級餘奔柘林其他倭復掠蘇州境延及江陰無錫出入太湖大抵真倭十之三

從倭者十之七倭戰則驅其所掠之人為軍鋒法嚴人
皆致死而官軍素懷怯所至潰奔帝乃遣工部侍郎趙
文華督察軍情文華顛倒功罪諸軍益解體經天寵並
被逮代以周琬胡宗憲踰月琬罷代以楊宜時賊勢蔓
延江浙無不蹂躪新倭來並衆益肆毒每自焚其舟登
岸劫掠自杭州北新關西剽淳安竄徽州歙縣至績谿
旌德過涇縣趨南陵遂達蕪湖燒南岸奔太平府犯江
寧鎮徑侵南京倭紅衣黃蓋率衆犯大安德門及夾岡

乃趨秣陵關而去由溧水流劫溧陽宜興聞官兵自太湖出遂越武進抵無錫駐惠山一晝夜奔百八十餘里抵潁野為官軍所圍追及於楊林橋殲之是役也賊不過六七十人而經行數千里殺戮戰傷者幾四千人歷八十餘日始滅此三十四年九月事也應天巡撫曹邦輔以捷聞文華忌其功以倭之巢於陶宅也乃大集浙直兵與宗憲親將之又約邦輔合勦分道並進營於松江之甌橋倭悉銳來衝遂大敗文華氣奪賊益熾十月

倭自樂清登岸流劫黃巖仙居奉化餘姚上虞被殺虜者無算至嵎縣乃殲之亦不滿二百人顧深入三府歷五十日始平其先一枝自山東日照流劫東安衛至淮安贛榆沐陽桃源至清河阻雨為徐邳官兵所殲亦不過數十人流害千里殺戮千餘其悍如此而文華自甌橋之敗見倭勢甚其自柘林移於周浦與泊於川沙舊巢及嘉定高橋者自如他侵犯者無虛日文華乃以寇息請還朝明年二月罷宜代以宗憲以阮鶚巡撫浙江

於是宗憲乃請遣使諭日本國王禁戢島寇招還通番
奸商許立功免罪既得旨遂遣寧波諸生蔣洲陳可願
往及是可願還言至其國五島遇汪直毛海峯謂日本
內亂王與其相俱死諸島不相統攝須徧諭乃可杜其
入犯又言有薩摩洲者雖已揚帆入寇非其本心乞通
貢互市願殺賊自効乃留洲傳諭各島而送可願還宗
憲以聞兵部言直等本編民既稱効順即當釋兵乃絕
不言及第求開市通貢隱若屬國然其奸叵測宜令督

臣振揚國威嚴加備禦移檄直等俾勦除舟山諸賊巢以自明果海疆廓清自有恩賚從之時兩浙皆被倭而慈谿焚殺獨慘餘姚次之浙西柘林乍浦烏鎮皂林間皆為賊巢前後至者二萬餘人命宗憲亟圖方略七月宗憲言賊首毛海峯自陳可願還一敗倭寇於舟山再敗之瀝表又遣其黨招諭各島相率効順乞加重賞令宗憲以便行當是時徐海陳東麻葉方連兵攻圍桐鄉宗憲設計間之海遂禽東葉以降盡殲其餘衆於乍浦

未幾復蹴海於梁莊海亦授首餘黨盡滅江南浙西諸
寇畧平而江北倭則犯丹陽及掠瓜洲燒漕艘者明春
復犯如皋海門攻通州掠揚州高郵入寶應遂侵淮安
府集於廟灣逾年乃克其浙東之倭則盤踞於舟山亦
先後為官軍所襲先是蔣洲宣諭諸島至豐後被留令
僧人往山口等島傳諭禁戢於是山口都督源義長具
咨送還被掠人口而咨乃用國王印豐後太守源義鎮
遣僧德陽等具方物奉表謝罪請頒勘合修貢送洲還

前楊宜所遣鄭舜功出海哨探者行至豐後島島主亦遣僧清授附舟來謝罪言前後侵犯皆中國奸商潛引諸島夷衆義鎮等實不知於是宗憲疏陳其事言洲奉使二年止歷豐後山口二島或有貢物而無印信勘合或有印信而無國王名稱皆違朝典然彼既以貢來又送還被掠人口實有畏罪乞恩意宜禮遣其使令傳諭義鎮義長轉諭日本王禽獻倡亂諸渠及中國奸宄方許通貢詔可汪直之踞海島也與其黨王激葉宗滿謝

和王清溪等各挾倭寇為雄朝廷至懸伯爵萬金之賞以誘之迄不能致及是內地官軍頗有備倭雖橫亦多被勦戮有全島無一人歸者往往怨直直漸不自安宗憲與直同郡館直母與其妻孥於杭州遣蔣洲齎其家書招之直知家屬固無恙頗心動義鎮等以中國許互市亦喜乃裝巨舟遣其屬善妙等四十餘人隨直等來貢市於三十六年十月初抵舟山之岑港將吏以為入寇也陳兵備之乃遣王激入見宗憲謂我以好來何故

陳兵待我澈即毛海峯直養子也宗憲慰勞甚至指心
誓無他俄善妙等見副將盧鏜於舟山鏜令禽直以獻
語洩直益疑宗憲開諭百方直終不信曰果爾可遣澈
出吾當入見宗憲立遣之直又邀一貴官為質即命指
揮夏正往直以為信遂與宗滿清溪偕來宗憲大喜禮
接之甚厚令謁巡按御史王本固於杭州本固以屬吏
澈等聞大恨支解夏正焚舟登山據岑港堅守逾年新
倭大至屢寇浙東三郡其在岑港者徐移之柯梅造新

舟出海宗憲不之追十一月賊揚帆南去泊泉州之浯
嶼掠同安惠安南安諸縣攻福寧州破福安寧德明年
四月遂圍福州經月不解福清永福諸城皆被攻燬蔓
延於興化奔突於漳州其患盡移於福建而潮廣間亦
紛紛以倭警聞矣至四十年浙東江北諸寇以次平宗
憲尋坐罪被逮明年十一月陷興化府大殺掠移據平
海衛不去初倭之犯浙江也破州縣衛所城以百數然
未有破府城者至是遠近震動亟徵俞大猷戚繼光劉

顯諸將合擊破之其侵犯他州縣者亦為諸將所破福建亦平其後廣東巨寇曾一本黃朝太等無不引倭為助隆慶時破碣石甲子諸衛所已犯化州石城縣陷錦囊所神電衛吳川陽江茂名海豐新寧惠來諸縣悉遭焚掠轉入雷廉瓊三郡境亦被其患萬歷二年犯浙東寧紹台溫四郡又陷廣東銅鼓衛雙魚所三年犯電白四年犯定海八年犯浙江韭山及福建澎湖東湧十年犯溫州又犯廣東十六年犯浙江然時疆吏懲嘉靖之

禍海防頗飭賊來輒失利其犯廣東者為蜚賊梁本蒙
勾引勢尤猖獗總督陳瑞集衆軍擊之斬首千六百餘
級沈其船百餘艘本蒙亦授首帝為告謝郊廟宣捷受
賀云日本故有王其下稱關白者最尊時以山城州渠
信長為之偶出獵遇一人卧樹下驚起衝突執而詰之
自言為平秀吉薩摩洲人之奴雄健驕捷有口辯信長
悅之令牧馬名曰木下人後漸用事為信長畫策奪并
二十餘州遂為攝津鎮守大將有叅謀阿奇支者得罪

信長命秀吉統兵討之。俄信長為其下明智所殺。秀吉方攻滅阿奇支聞變與部將行長等乘勝還兵誅之。威名益振。尋廢信長二子僭稱關白。盡有其衆。時為萬曆十四年。於是益治兵。征服六十六州。又以威脅琉球。呂宋。暹羅。佛郎機諸國皆使奉貢。乃改國王所居山城為大閣。廣築城郭。建宮殿。其樓閣有至九重者。實婦女珍寶。其中其用法嚴。軍行有進無退。違者雖子壻必誅。以故所向無敵。乃改元文祿。并欲侵中國。滅朝鮮。而有之。

召問故時汪直遺黨知唐人畏倭如虎氣益驕益大治
兵甲繕舟艦與其下謀入中國北京者用朝鮮人為導
入浙閩沿海郡縣者用唐人為導慮琉球洩其情使毋
入貢同安人陳甲者商於琉球懼為中國害與琉球長
史鄭迴謀因進貢請封之使具以其情來告甲又旋故
鄉陳其事於巡撫趙參魯參魯以聞下兵部部移咨朝
鮮王王但深辨嚮導之誣亦不知其謀已也初秀吉廣
徵諸鎮兵儲三歲糧欲自將以犯中國會其子死旁無

兄弟前奪豐後島主妻為妾慮其為後患而諸鎮怨秀
吉暴虐咸曰此舉非襲大唐乃襲我耳各懷異志由是
秀吉不敢親行二十年四月遣其將清正行長義智僧
元蘇宗逸等將舟師數百艘由對馬島渡海陷朝鮮之
釜山乘勝長驅以五月渡臨津掠開城分陷豐德諸郡
朝鮮望風潰清正等遂偪王京朝鮮王李昫棄城奔平
壤又奔義州遣使絡繹告急倭遂入王京執其王妃王
子追奔至平壤放兵淫掠七月命副總兵祖承訓赴援

與倭戰於平壤城外大敗承訓僅以身免八月中朝乃以兵部侍郎宋應昌為經畧都督李如松為提督統兵討之是時寧夏未平朝鮮事起兵部尚書石星計無所出募能說倭者偵之於是嘉興人沈惟敬應募星即假游擊將軍銜送之如松麾下明年如松師大於平壤朝鮮所失四道並復如松乘勝趨碧蹄館敗而退師於是封貢之議起中朝彌縫惟敬以成款局事詳朝鮮傳久之秀吉死諸倭揚帆盡歸朝鮮患亦平然自關白侵東國前後七載喪師數十萬糜餉數百萬中朝與朝

鮮迄無勝算至闔白死兵禍始休諸倭亦皆退守島巢
東南稍有安枕之日矣秀吉凡再傳而亡終明之世通
倭之禁甚嚴閭巷小民至指倭相詈罵甚以噤其小兒
女云

明史卷三百二十二

欽定四庫全書

明史卷三百二十二考證

日本傳天使亦趙姓豈良弼裔耶

臣章宗瀛按豈蒙

古裔耶句吾學編又續文獻通考俱稱豈良弼裔耶似更明晰舊本良弼誤蒙古謹據改

日本傳帝益嘉其誠於是遣行人潘賜偕中官王進賜其王九章

臣章宗瀛按殊域周咨錄潘賜於永樂

初以行人司日本進歸永樂大典頌及歸化書因擢

禮部郎中賜以永樂二年成進士不應於四年即官
鴻臚也殊域錄於八年弔祭源道義之使則為太監
雷春鴻臚少卿潘賜吾學編亦同傳於序次時移潘
賜後來之官位於其先而又不載八年使事殊為失
實謹據改

日本傳明年春遣僉都御史俞士吉

臣章宗瀛按士

吉附載夏原吉傳宣德初方為南京刑部侍郎其出
使日本時則僉都御史也獻徵錄並同舊本誤正月

又遣侍郎謹據改

日本傳使臣清啟復來貢

臣章宗瀛按清啟復來貢

之下應有其下二字義方明晰下文還至濟寧其下復持刀殺人蓋蒙此處傷人於市而言則為脫落無疑舊本誤謹增入

日本傳兩地官弁不相統

臣章宗瀛按原本作不相

統攝蓋以兩省不一其權故也義最明晰謹據改

日本傳浙閩大姓素為倭內主者失利為怨紕

臣章

宗瀛按是時佛郎機米商至漳民畏紈厲禁不與通
商人與漳民格鬪紈令都指揮盧鏜海道副使柯喬
悉殺之御史陳九德核其專擅濫殺詔罷紈下鏜喬
吏命給事王家楨即訊如御史言鏜喬論死逮紈至
京紈自殺於是當事者以紈為戒見識大錄謹附考
日本傳趨南陵遂達蕪湖

臣章宗瀛按賊自浙至南

陵無阻之者蕪湖丞陳一道引軍來援賊手接我所
射箭皆相顧愕眙一道麾軍與僕于義見之見識大

錄謹附考

日本傳與其黨王澈葉宗滿謝和王清溪等

臣章宗

瀛按直黨葉宗滿胡宗憲傳作葉碧川與此不同謹識

日本傳直以為信遂與宗滿清溪偕來

臣章宗瀛按

宗憲令直自繫獄待命因以狀聞請姑許諸番貢市
曲貸直等用繫番人心俾經營自贖御史王本固不
可江南人沟沟言宗憲得倭人金宗憲恐乃易疏言

直等死在不赦廷議梟直而戌其黨見識大錄謹附
考

日本傳又陷廣東銅衛雙魚所所臣章宗瀛按兵志
所載各衛所廣東有雙魚所其銅鼓衛轄於湖廣不
屬濱海謹附考

日本傳陷朝鮮之釜山乘勝長驅五月渡臨津臣章

宗瀛按統志朝鮮有釜山朝鮮傳亦作釜舊本釜誤
金渡臨津誤渡津謹據改

明史卷三百二十二考證